



ALTERNATIV DEMOKRATESCH
REFORMPARTEI

Groupe parlementaire

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 2. Juni 2021

Här President,

esou wéi d'Chamberreglement et virgesäit, bieden ech Iech, dës parlamentaresch Fro un d'Madamm Gesondheitsminister weiderzeleeden.

Fuerscher vun der Universitéit Ulm hu Veronrengungen am Impfstoff vun AstraZeneca respektiv „Vaxzevira“ fonnt. D'Fuerscher hunn hei dräi Chargé vum Impfstoff mat biochemesche Methoden a Proteomanalysen ënnersicht. Nieft de Proteine vum Vaccin selwer konnte si eng substanzuell Unzuel vu mënschleche Proteinen an och vu regulatoresche virale Proteine fannen, déi net an den Impfstoff gehéieren.

D'Resultat vun dëser Ënnersichung huet erginn, datt ënnert deene fonnte Proteine vu mënschlechem Ursprung virun allem sougenannten Hitzeschockproteine wieren. Extrazellulär Hitzeschockproteine solle bekannt sinn dofir, datt si ugebueren an ugëeegent Immunäntwerte moduléieren a bestoend Entzündungsreaktioune verstärke kënnen. Si goufen och scho mat Autoimmunreaktiounen a Verbindung bruecht. De Responsabele vun der Gentherapie op der Universitéit Ulm huet betount, et wier néideg, den Hierstellungsprozess an d'Qualitéitskontroll vum Impfstoff ze iwwerschaffen. Datt e pharmazeutescht Produkt méiglechst wäit fräi ass vun esou Veronrengungen, gëllt ëmmerhin als wichtege Qualitéitskrittär an der Pharmaindustrie.

(Dës Aussoen an Informatiounen sinn ënner anerem op www.uni-ulm.de zougänglech.)

An der Fuerschung gëtt elo kontrovers diskutéiert, iwwert den Afloss vun deene Veronrengungen op d'Wierksamkeit vum Impfstoff, a méiglecherweis esouguer op d'Ausmooss vun den Niewewierkungen an d'Entstoe vun de liewensgeféierleche Blutgerinnsel.

An deem Kontext wéilt ech der Madamm Gesondheitsminister gär folgend Froe stellen:

1. Ass d'Regierung a Kenntnes vun dëse Fuerschungsergebnisser an den domat verbundene kontroversen Diskussiounen?

2. Wéi steet d'Regierung zu dëse Fuerschungseresultater?
3. Wat heescht dat fir Lëtzebuerg? Ass d'Madamm Gesondheetsminister der Meenung, datt een d'Impfe mam AstraZeneca respektiv „Vaxzevira“ aus Sécherheetsgrënn stoppe sollt, bis dës wichteg Froen, déi d'Fuerschungseresultater vun der Universitéit Ulm opgeworf hunn, gekläert gi sinn? Wann nee, firwat net?

Mat déiwem Respekt,



Jeff Engelen
Deputéierten